

## संकटमोचन हनुमानाष्टक

मत्तगयन्द छन्द

बाल समय रबि भक्षि लियो तब तीनहुँ लोक भयो अँधियारो ।  
ताहि सों त्रास भयो जग को यह संकट काहु सों जात न टारो ।  
देवन आनि करी बिनती तब छाँड़ि दियो रबि कष्ट निवारो ।  
को नहिं जानत है जगमें कपि संकटमोचन नाम तिहारो ॥ १ ॥

बालि की त्रास कपीस बसै गिरि जात महाप्रभु पंथ निहारो ।  
चौंकि महा मुनि साप दियो तब चाहिय कौन बिचार बिचारो ।  
कै द्विज रूप लिवाय महाप्रभु सो तुम दास के सोक निवारो ।  
को नहिं जानत है जगमें कपि संकटमोचन नाम तिहारो ॥ २ ॥

अंगद के सँग लेन गये सिय खोज कपीस यह बैन उचारो ।  
जीवत ना बचिहौ हम सो जु बिना सुधि लाए इहाँ पगु धारो ।  
हेरि थके तट सिंधु सबै तब लाय सिया सुधि प्रान उबारो ।  
को नहिं जानत है जगमें कपि संकटमोचन नाम तिहारो ॥ ३ ॥

रावन त्रास दई सिय को सब राक्षसि सों कहि सोक निवारो ।  
ताहि समय हनुमान महाप्रभु जाय महा रजनीचर मारो ।  
चाहत सीय असोक सों आगि सु दै प्रभु मुद्रिका सोक निवारो ।  
को नहिं जानत है जगमें कपि संकटमोचन नाम तिहारो ॥ ४ ॥

बान लग्यो उर लछिमन के तब प्रान तजे सुत रावन मारो ।  
लै गृह बैद्य सुषेन समेत तबै गिरि द्रोन सु बीर उपारो ।  
आनि सजीवन हाथ दई तब लछिमन के तुम प्रान उबारो ।  
को नहिं जानत है जगमें कपि संकटमोचन नाम तिहारो ॥ ५ ॥

रावन जुद्ध अजान कियो तब नाग कि फाँस सबै सिर डारो ।  
श्रीरघुनाथ समेत सबै दल मोह भयो यह संकट भारो ।  
आनि खगेस तबै हनुमान जु बंधन काटि सुत्रास निवारो ।  
को नहिं जानत है जगमें कपि संकटमोचन नाम तिहारो ॥ ६ ॥

बंधु समेत जबै अहिरावन लै रघुनाथ पताल सिधारो ।  
देबिहिं पूजि भली बिधि सों बलि देउ सबै मिलि मंत्र बिचारो ।  
जाय सहाय भयो तब ही अहिरावन सैन्य समेत सँहारो ।  
को नहिं जानत है जगमें कपि संकटमोचन नाम तिहारो ॥ ७ ॥

काज किये बड़ देवन के तुम बीर महाप्रभु देखि बिचारो ।  
कौन सो संकट मोर गरीब को जो तुमसों नहिं जात है टारो ।  
बेगि हरो हनुमान महाप्रभु जो कछु संकट होय हमारो ।  
को नहिं जानत है जगमें कपि संकटमोचन नाम तिहारो ॥ ८ ॥

दोहा

लाल देह लाली लसे अरु धरि लाल लँगूर ।

बज्र देह दानव दलन जय जय जय कपि सूर ॥

सियावर रामचन्द्र पद गहि रहूँ ।

उमावर शम्भुनाथ पद गहि रहूँ ।

महावीर बजरङ्गी पद गहि रहूँ ।

शरणा गतो हरि ॥

॥ इति गोस्वामि तुलसीदास कृत संकटमोचन हनुमानाष्टक सम्पूर्ण ॥

Encoded and proofread by Girish Beeharry,

Additional proofreading by Anil Gur (anilgur at rediffmail.com)

and Sunder Hattangadi

Please send corrections to [sanskrit@cheerful.com](mailto:sanskrit@cheerful.com)

Last updated त्oday

<http://sanskritdocuments.org>

Hanuman Ashtakam ( Sankata Mochana ) Lyrics in Devanagari PDF

% File name : sankatamochana.itx

% Category : chAlisA

% Location : doc\\_z\\_otherlang\\_hindi

% Language : Hindi

% Subject : hinduism/religion

% Transliterated by : Girish Beeharry

% Proofread by : Anil Gur (anilgur at rediffmail.com) and Sunder Hattangadi

% Description-comments : Devotional hymn to Hanuman, prayer to remove problems

% Latest update : March 13, 2015

% Send corrections to : [Sanskrit@cheerful.com](mailto:Sanskrit@cheerful.com)

% Site access : <http://sanskritdocuments.org>

%

% This text is prepared by volunteers and is to be used for personal study  
% and research. The file is not to be copied or reposted for promotion of  
% any website or individuals or for commercial purpose without permission.  
% Please help to maintain respect for volunteer spirit.  
%

We acknowledge well-meaning volunteers for [Sanskritdocuments.org](http://Sanskritdocuments.org) and other sites to have built the collection of Sanskrit texts.

Please check their sites later for improved versions of the texts.

This file should strictly be kept for personal use.

PDF file is generated [ December 8, 2015 ] at [Stotram](http://Stotram) Website